

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 445605 23 St
Tuzla, 21.08.2023. godine

Općinski sud u Tuzli, stečajni sudija Vedran Milašinović, u stečajnom postupku nad dužnikom „STUP COMPANY“ d.o.o. za trgovinu, promet i usluge Gradačac, Mionica bb, u likvidaciji, sa podružnicom „STUP COMPANY“ d.o.o. Gradačac, podružnica 1 Ilidža, Stupsko brdo bb, koga zastupa punomoćnik Hazim Huskić advokat iz Gradačca, dana 21.08.2023. godine donio je sljedeće:

RJEŠENJE

Obustavlja se likvidacioni postupak nad društvom „STUP COMPANY“ d.o.o. za trgovinu, promet i usluge Gradačac, Mionica bb, sa podružnicom „STUP COMPANY“ d.o.o. Gradačac, podružnica 1 Ilidža, Stupsko brdo bb.

Likvidator Nedžad Sinanović iz Gradačca, razrješava se dužnosti likvidatora.

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom dužnika „STUP COMPANY“ d.o.o. za trgovinu, promet i usluge Gradačac, Mionica bb, sa podružnicom „STUP COMPANY“ d.o.o. Gradačac, podružnica 1 Ilidža, Stupsko brdo bb.

Za privremenog stečajnog upravnika imenuje se Emir Nuhanović iz Živinica, Priluk 65.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- obezbijediti imovinu dužnika i starati se o istoj,
- ima ovlaštenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i
- uraditi kontrolu poslovanja stečajnog dužnika.
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u prethodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama F BiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Gradačcu i imovinsko-pravnoj službi Grada Gradačca, radi upisa zabilježbe otvaranja prethodnog postupka.

Obrazloženje

„STUP COMPANY“ d.o.o. za trgovinu, promet i usluge Gradačac, Mionica bb, sa podružnicom „STUP COMPANY“ d.o.o. Gradačac, podružnica 1 Ilidža, Stupsko brdo bb je dana 28.04.2023. godine prijedlog za pokretanje likvidacionog postupka nad ovim pravnim licem.

Rješenjem broj: 32 0 L 445605 23 L od 29.05.2023. godine otvoren je likvidacioni postupak nad navedenim društvom, imenovan je likvidator, te su pozvani povjerioci da u roku od trideset dana prijave svoja potraživanja prema društvu. Ročište za ispitivanje prijave potraživanja je zakazano za dan 20.07.2023. godine.

U spis suda je dana 16.06.2023. godine dostavljena prijava potraživanja od strane Porezne uprave KPU Tuzla u iznosu od 12.509,53 KM.

Na ročištu za ispitivanje potraživanja likvidator je izjavio da društvo nema zaposlenih radnika, nema nepokretnu imovinu, pokretnu imovinu niti sredstava na računu kod banke, s obzirom da je račun blokiran još od 2010. godine, niti bilo kakve druge imovine koja bi se mogla unovčiti. Pomenutu prijavu potraživanja je priznao u cjelosti, navodeći da to čini radi efikasnosti postupka u smislu smanjenja troškova, a kako bi se bez gubitka vremena proveo odgovarajući postupak koji bi u konačnici rezultirao prestankom postojanja ovog pravnog društva.

Istakao je da će po pozivu suda predujmiti troškove za provođenje stečajnog postupka, te je predložio da sud obustavi likvidacioni postupak, a da se postupak nastavi voditi prema odredbama Zakona o stečaju i to na način da se ne otvara direktno stečajni postupak nego da sud donese rješenje o otvaranju prethodnog stečajnog postupka, te da ga sud rješenjem donesenim na ročištu i usmeno objavljenim pozove da predujmi troškove provođenja prethodnog postupka.

Sud je na ročištu od 20.07.2023. godine pozvao predlagača da uplati iznos od 3.000,00 KM na ime predujma troškova provođenja prethodnog stečajnog postupka, a navedena novčana sredstva su uplaćena dana 07.08.2023. godine o čemu je predlagač kao dokaz dostavio uplatnicu u spis suda.

Shodno odredbama Zakona o likvidacionom postupku (Objavljeno u "Sl. novine FBiH", br. 29 od 30 juna 2003), svrha likvidacionog postupka je potpuno namirenje svih povjerilaca pravnog lica unovčenjem njegove imovine (član 2), likvidator je ovlašten i dužan unovčiti imovinu (član 9 stav 1), nakon čega namiruje povjerioce (član 11), te se nakon dostavljanja dokaza o potpunom namirenju (diobi) donosi rješenje o zaključenju likvidacionog postupka (član 14).

Ukoliko su ispunjene pretpostavke za provođenje stečajnog postupka, likvidator je dužan u roku od 15 dana podnijeti prijedlog za pokretanje stečaja (član 11 stav 3).

U konkretnom slučaju nije bilo moguće provesti i okončati likvidacioni postupak, s obzirom da iz dosadašnjih rezultata postupka proizilazi da društvo ima obaveze, ali da iz izvještaja likvidacionog upravnika proizilazi da društvo nema bilo kakve imovine koja bi se mogla unovčiti radi izmirenja te obaveze.

S obzirom na navedeno, sud je donio odluku da se obustavi likvidacioni postupak u ovoj pravnoj stvari i sljedstveno je imenovani likvidator razriješen dužnosti likvidatora, a kako iz dosadašnjeg toka postupka proizilazi vjerovatnost platežne nesposobnosti dužnika u smislu člana 6 Zakona o stečaju („Sl. novine F BiH“, br.53/2021), te da je postupak pokrenut od strane ovlaštenog predlagača u smislu odredbe člana 58. stav 1. i 2. Zakona o stečaju („Sl. novine F BiH“, br.53/2021. u daljem tekstu Zakon o stečaju), te da su uplaćena sredstva za provođenje prethodnog stečajnog postupka, sud je donio odluku o pokretanju prethodnog stečajnog postupka.

Konačno stanje u pogledu eventualno drugih obaveza, stanja imovina iz koje bi se eventualno mogli namiriti troškovi i stečajni povjerioci, će se definitivno utvrditi na osnovu izvještaja privremenog stečajnog upravnika o poslovnom stanju kod predlagača sa izjašnjenjem o uslovima za otvaranje stečaja, u smislu odredbe člana 61 stav 1 Zakona o stečaju.

Odluka iz stava 3 ovog rješenja donesena je temeljem odredbe člana 63 Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71 Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

Stečajni sudija
Vedran Milašinović

POUKA O PRAVNOM LIJEKU:

Protiv ovog rješenja dozvoljena je žalba u roku od 8 (osam) dana, računajući od dana objavljivanja. Žalba se podnosi Kantonalnom sudu putem ovog Suda.